

მუჭანახევარა

იყო და არა იყო რა, იყო ორი კაცი. ერთი ქოთანს ლობიო ჰქონდათ, მარილი კი აღარ ჰქონდათ, რომ შეჭამანდისთვის დაეყარათ.

ერთმა უთხრა მეორეს: ხომ ხედავ, მარილი არა გვაქვს, წადი ქალაქში და იყიდე მუჭანახევარი მარილი!

- დამავიწყდება, - უპასუხა მეორე კაცმა, - როგორ დავიხსომო.

- წადი და გზაზე სულ ის იმახე: მუჭანახევარი, მუჭანახევარი-თქო!

წავიდა ეს კაცი მარილის საყიდლად ქალაქში. გზაზე ერთი კაცი დაინახა, მოუხნავს მამული, პურსა თესავს და თან იმახის: ერთი ათასად, ერთი ათასადო!

გაიარა კაცმა და თან ყვირის: მუჭანახევარი, მუჭანახევარიო!

მთესველს ბრაზი მოუვიდა: მე ერთი ათასად მომივიდეს, იმას ვითხოვ, შენ მუჭანახევარს ამბობო! დაიჭირა და მაგრად სცემა, გული რომ მოიჯერა, თავი დაანება.

კაცმა უთხრა:

- რადა მცემ, რა დაგიშავე, კინაღამ მომკალიო!

- იმიტომა გცემე, - უპასუხა მთესველმა, - რომ მე ვიძახოდი - ერთი ათასად და შენ - მუჭანახევარიო!

- მაშ, როგორ უნდა მეთქვაო? - ჰკითხა კაცმა.

- ერთი ათასად, ერთი ათასად და ბევრსაც დაგიმადლებდიო! - უპასუხა მთესველმა.

წავიდა აქედან მარილის მყიდველი და ერთ სოფელში მივიდა.

კაცი ვინმე მომკვდარა დამარხავენ. გაუარა გვერდზე ამ კაცმა და დაუძახა: ერთი ათასად, ერთი ათასადო!

გამოუხტნენ ეს მკვდრის პატრონები, მიატყეს და მიატყეს, გული რომ მოიჯერეს, თავი დაანებეს,

- რაზე მაკლავთ თქვე ურჯულოებო, მაშ, როგორ უნდა მეთქვაო? - ჰკითხა მარილის მყიდველმა,

- როგორ და უნდა მოსულიყავ. ქუდი მოგებადა და გეთქვა: ღმერთსა ვთხოვ, რომ ეგ ამბავი პირველი და უკანასკნელი იყოს თქვენს ოჯახში-თქო! პატივსაც ბევრსა გცემდით და გაგისტუმრებდითო!

წამოვიდა იქიდანაც მუჭანახევარა და ერთ ადგილას ნეფიონს შემოხვდა. მოიხადა ქუდი, დადგა და დაუძახა:

- ღმერთსა ვთხოვ, რომ თქვენს ოჯახში ეგ ამბავი პირველი და უკანასკნელი იყოსო!

გადმოუხტნენ მაცრები, მიატყეს და მიატყეს, რაც სიგრძე ჰქონდა, ის განი მისცეს.

მუჭანახევარამაც, როგორც იყო, მოიბრუნა სული და უთხრა მაცრებს:

- რაზე მაკლავთ, რა დაგიშავეთ? მე ვერე მასწავლეს, მაშ, როგორღა უნდა მეთქვაო?

მაცრებმა უთხრეს: ქუდი უნდა მოგებადა, მოსულიყავი და სულ „ნეფეს გაუმარჯოს“ „ნეფეს გაუმარჯოს“ - გეყვირაო.

ამათ რომ გადაურჩა მუჭანახევარა, ისევ თავის გზას გაუდგა. ცემისაგან გვერდები სტკიოდა. იმასღა ფიქრობდა: როგორღა ვთქვა, ვინმე რომ შემომხვდესო.

გზაზე ერთი მონადირე დაინახა. შემოუყენებია ჩახმახი და მტრედებს ეპარება. მუჭანახევარამ მოიგლიჯა ქუდი და „ნეფეს გაუმარჯოს“ ძახილით გაიქცა მონადირისაკენ. მტრედები გაფრთხილდნენ და გაფრინდნენ.

წამოხტა მონადირე და კბილების კრაჭუნით გაექანა მუჭანახევარასაკენ. მოსდო და მოსდო თოფის კონდახი ზურგში, იმდენი სცემა, კინაღამ სული ამოხადა. ბოლოს გული რომ იჯერა, დაანება თავი.

მუჭანახევარამ ჰკითხა:

- სამართალი აღარა გაქვს, კაცო, რომ მცემ, რადა მცემ, რა დაგიშავე? მაშ, როგორ უნდა მოვქცეულიყავი, ან რა მექნა, ან რა მექნაო?

მონადირემ უთხრა:

- ხმა არ უნდა ამოგელო, უნდა დაკუზულიყავი და ისე გაგველო; მტრედები ვეღარ დაგინახავდნენ და აღარც მოგხვდებოდაო.

მიდი მუჭანახევარა და ღობეს მიადგა. დაიკუზა და ისე მიიპარება ღობის ძირზე. ოთხ კაცს ფულიანი ქისა დაუკარგავთ და ეძებენ. მუჭანახევარა რომ დაინახეს, როგორ მიიპარება, გამოუდგნენ, სტაცეს ხელი ჩოხის ბოლოში და დაიჭირეს.

- სად მიიპარები, შე ყაჩაღო და არამზადავ, შენა, იპოვე და მალავო?! - ურტყეს და ურტყეს.

იმდენი სცემეს საწყალ კაცს, რომ შინამდის ფეხები ძლივს მითრია...

ჭირი იქა, ლხინი აქა,

ქატო იქა, ფქვილი აქა.